

Buna sira! Buna sira, me cari siuri! A suma turna chî, me e la me cum-pagnia ad grippiòn. Anche istani S. Peder na 15/na al di prima ad Nadal, u m'â tirâ fora d'ant'iarmari e i casôn, u m'â gavâ an po' ad puvî, an po' ad naftalina, e cun i noster fagot, el noster pîvi, u m'â bitâ a cavâ d'na steial cun la coua, e ancora na vota u m'â spedî an s'la tera, acsi chî, a cà di sti bravi Frà, per dei ancora in gir, per la 54^a vota, a sta Divota Cume-dia.

A i'uma meia face in viaggi tont bel cun tücc si maciafer chi giru antur a la tera, tücc i mument u j'è el pericùl ad gnaches i'os; meno male che la nostra steila l'ava el sentüri ad sicürësa e i fren a disco ansuma tüt el 4 roui.

Pensè che ammac na 20/na d'ani fa, avnivu sù a ruota libera.

Apèna rivà as suma anfurmà an sla situasiòn! I m'on dic ca suma an crisi, che el periodo del BUM, del benessere, a l'è finì. I disu ca suma ridùt a la fam; per forza - a suma la Nasion cl'a fa pù aperitiv ad tücc, pù t'na peji e pù ut ven fam.

Mei però donda in ugiada an gir, pasonda davanti ai negosi, uardonda la gent c'la gira per el strà, um smeia anveci ca seuu tücc rich, o forse a stuma stüdiònda tücc da rich. Se po' a saruma prumos a l'è difìcil da dî.

I vighi, na vota, se jën u riusciva a mangè tücc i dî in piat ad pasta e fasò, in piat ad ris e cisi, na barnêta ad pulenta e marlûs, a l'era jën cu stava ben, l'era in dritu. Quondi chi l'ancuntravi per la strà i divi "Cme stai ben, t'la peii giüsta eh!, tei gras cme 'n frà". Adès anveci quondi chi s'ancontru, la gent la dis "C'me stai ben! tei magher c'me 'n ciò, tei an furma, us vigh tücc i'os, t'ai nent na fila ad ponsa, t'ai tüt torace".

Adès tücc i fon la dieta, la cura dimagrante. A iuma scupert el pom-pel-mo! Noi, ai me temp, a savu mon se ca l'era el pom-pel-mo. Pensondia ben, però, se ca l'è! In limon angrasà, in limon pù madür, ut liga fina i dencec dla dentera. Epüra, se jën a la mateina, da culasion, us fa nent na spremuta ad pom-pel-mo a l'è in omi finì, a l'è jën che an t'la vita, ad strà u nà farà mai meia.

A stüdioma da ric: ades quasi tücc j'on la 2^a machina, la 2^a cà per il wek-end, u 2° televisur; cuc d'ën l'â fina crumpâ la 2^a muiè.

Au sabet e la duminica, per rilasesi, el vâ an gir cun la roulotte; del famij che normalment i vivu an 60 o 100 meter quader d'alogg, i devu

racesi an 2 o 3 meter. El papà e la mama i dromu an tu liciòn. Liciòn? 30 cm. per 100, infatti i dromu ad costa. I fiò, jèn an t'u lavandèn, l'ater pu cit, an t'el water.

Mei a j'ò ancuntrà in me amis, tut piegà an doi, cun el mur an tera, a j'ò dioc: "Giuanì! Se t'ai face? U t'el amni l'ernia du disco?". "No! Niente! U j'è suces niente! A j'ò ammac pasà el ferii an s'la roulette!".

Ades tücc i stüdiu, tücc i fòn el scöli outi, l'istruzione a l'è dventaia ubligatoria, ammac l'ignuronsa a l'è armasa facultativa! Tücc i sercu ad piè el famus toc ad carta, la famusa laurea, cl'è fa pionsi ad cumusiòn i pari e el mari, e ad fam i fiò.

Eh! la me cara gent, a suma entrà ant l'era del progresso: na vota i maiòn, i scapèn, ij favu el noster noni, d'invern an t'la stala, magari it favu el monij ch'it rivavu fina al ponci di di, perchè el "fanciòt el crës", acsei quondi che la roba ut c'mensava andè ben, t'avi di bogg an t'i gumi gros dacsei! E anlura j'avu monc anventà el ciapi ad curam per stupei! Però j'eru d'loina-loina, l'è punsiva an po' ma la t'niva coud. Ades anveci i fon i maion a machina, i bitu fina el marchio "Pura lana vergine". Però, quondi t'rivi a cà la sira, e au scür, per nent svigè la muiè c'la drom, e pô la cioca perchè t'ei avni a cà tardi, ui part del lampà dal maion, che a mumént t'la fai sauté sù d'au lecc "Signur-Signur che tempural! Tira sù el tapareli!". "No, sta tranquila, l'è gnente; am son ammac gavà el maiòn".

Adès an America i drobu monc pù la sedia elettrica, ai cundanà a mort i disu "Per piasì, cus buta an po' is poulover" e ZAC! l'arman lei bele sèc.

A i'uma el problema d'l'inquinamento atmosferico, e per culpa d'l'inquinamento anche la frùta a l'è pù cme na vota. Per fela amni senza gianèn, per salvela, i l'ampinisu ad chimica, e casei us salva; us salva la frùta, però la crepa la gent cu la mongia! Mei a cunos in culunél, che prima ad mangiè in pum, us bita an sl'attenti e el creia "Viva l'Italia!". Su dev muri el vò muri da patriota.

E gl'acqui medesim, i son tuti anquinaij; quondi chi'andei al mar, stè atent! Trè nent i gigu antl'acqua, nent perchè u sa sporca el mar, u s'acendia! I devi stè atent anche a la tintarella. Voi i va scrèdi d'esi neier dau sù, anveci i sei sporc ad petroliu.

Eh! sta crisi a l'è propi dapertüt, anche an tla Cesa u i'è la crisi d'la vucasiòn, specialment el fij, ma us capis, cun i nom d'iuridin religios cu j'è, is fij is fon piè da la poura: S. Maria Addolorata, S. Maria du Supplizio, S. Maria dla Delusiòn. Eh! cme cus fà! Ui va del curagi! Absogna

cambiè; S. Giovanna Addolorata fuori porta, us fa avnì: S. Giovanna in Centro; S. Maria Maggiore el vâ quasi ben, us buta: "S. Maria Maggiore - la potente Madonna Italiana". Anche chî ui vâ an po' ad reclam "Petrus - Il Santissimo che fa benissimo!". El previ ch'el vâ a dè l'oli sont u dev dî: "Io, la lattina dell'olio santo la voglio qui! Sul comodino", jën ul peia pû vulertera.

Ades anduma avonti tüt a publicità, tüt a reclâm; a l'è che tüt la gent ch' im fan vighi an t'i caroselli, la smeja tûta balenga, la rei semper, i mongiu in furmagen - i reiu, i mongiu la marmelata - i reiu, us vigh di pari chi venu a cà da travajè stonc cme bestii, na fam chi la vighu, la muiè ui porta na scatulèta ad carne Simmental, tei at disì: "Chî ui scopia el bugnòn, chî u tra tüt sù da la finestra"; no! Lü el brasa la muiè e ui dis: "Cara! Oggi mi hai fatto felice!".

I fanciòt jentru an cà, sciancà c'me di liber, sporc dapertut, e so mama anveci ad dei na caria ad boti, c'mè ai me temp, ul brasa, ui fa na caròsa, "Caro, non importa, con Flan-Flan, tutto torna bianco, più bianco del bianco!".

I nonu po', i vi jà ricordi c'me ch'jeru ai noster temp: jeru tantu brav e car, ma jeru semper an ti pê cme Mafè, ra giaca del pigiama ad flanela a righi, la sciarpa al col, la papalina an testa, i barbutavu tüt i dî. Ades anveci, an ti caroselli, tai vighi du vòti a l'ani, tücc trucà da la festa, a Nadal i portu el panatòn, a Pasqua la culomba, i beivu in bicer e via. Per tüt l'ani t'ai vighi pü.

El masnà pô i son di fenomeni. Noi im divu ch'ieru di pisargion; cui di caroselli però i smeiu di camel, i na fon del brenti. Us vigh ammac del mami chi cambeiu di pannolini.

El mami pô an ti caroselli i smeiu furbi, ma il son meja: sui fijsa nent l'avseina cui mostra a lavè i pavimento, a de sù la puvì, a fè el cafè, is mami an 15 dî i mondu la cà a rotoli.

A l'è l'era del progresso; adès in fiò cus rispeta a 18 ani l'ha la moto giapuneisa, la Honda, la Suzuki, cuedön l'ha fina l'automobil a 2 post, la Detommasso. Ai noster temp a 20 ani, im crumpavu la biciclèta a 2 post, jën an sla sela, l'ater an su stangon; e a piansivu fina, nent per la cuntentësa, l'era perchè ieru nent bon andei an suma.

A suma dventà tücc nevrotic, tücc agità; an machina a suma tücc Niki Lauda, guai al mond se jën um pasa davonti. Ier sira au semaforo dla stasiòn, na machina u s'è fermaia avsen ai n'atra; in omi tüt distint, l'a tirà sù el finestren, e cun la bava a la buca u s'è bità a criè "Se t'am tajj ancora la strà, mei at ròmp i corni!". E la muiè dl'ater, con tûta calma

“Tei sciapja i corni, che mei ai na fàs in para bei e nov”.

Anche noi a suma piasà cme cul doni, an s'el mercà, dop in ura chi ciciaravu “Mah! se ch'iuma mai da dì”.

Ciaciara, ciaciara, am smentiava sa ad ringrasiè tuc si bravi Frà, che cun tonta pasiensa im suportu tüt l'ani acsi chì; in ringrasiamént particular po' au noster Assistènt, al Padre Alessandro, u sa pù se fè per fem truvè ben an t'ista Assuciasion. Adès per noi dla mezza età, u stà preparondmi in bel giò da buci, chissà che magari sui scapa cuca bucià an sla testa 'd cuc dòn, ui vaga nent a post la culumbarda.

In ringrasiament po' gros dacsei a voi public, che tücc i'ani, e da 54 ani cun tanta pasiensa e cumpression i veni a drera al noster asnadi.

Adès av presént la me famija...

